



-Driin...

-Sì, pront

-Pront, Irme, ise za pronte la paste?

-Eh? Ce paste? Cui fevelial?

-Nò o sarin li tôr une, une e dîs

-Ma...

-Putanesche, eh!

-Ma cui sestu tu? Cui fevelial?

-Bon, si viodin alore, mandi

-Ma....

-Driin...

-Si, pront

-Le astu za metude su la aghe?

-Ce aghe, ma cuale aghe, ma sestu chel di prime?

-E une butilie di blanc, ise za in fresc?

-Ma ce distu, ma cui ti cognossie te, cui sestu?

-Bon Irme, a une o sin li dal sigûr, mandi

- Ma orpo di un! Ma ce! Mo jo o clami chei de SIP!
- Driin...
- Pront. Se tu sês chel di prime, va a picjâti! che jo o ai za...
- Cumò, Irme, tu puedis butâle, la paste, che o rivin dal moment
- Brut di un ludro cui crodistu di menâi la viole, crodistu che jo...
- E la butilie di tocai. In fresc, no dismenteâle, eh!
- Ma va là a fâti trai, can dal osti!
- E lis ulivis, eh! A coventin lis ulivis pe putanesche!
- Putan tu sarâs tu!
- Bon alore, che al sei dut pront, mi racomandi!
- Ti racomandi jo une forcje di rompitle pal zarneli, brut secjemirindis!
- Driin....
- Ma le astu finide? Viot che o clami...che o ai benzà clamade la pulizie, eh!
- Siore...siore...Che mi scolti
- Eh? Ce robe ise? Cui sestu? Nol è chel di prime lui?
- Cual di prime? Jo soi de SIP, culì che o clami
- Ah, de SIP. Che al scusi, lu vevi cjapât par un...un...
- Un che al telefone par cjoli vie la int, par fâle imbesteâ?
- Sì, po, propi cussì. Ma ce maniere fasial lui a savê...
- Eh, siore...Ise la siore Irme Tesulin, jê?
- Sì, jo
- Eh! O savin che a son dai matarans che si divertissin a fâ diventâ mate la int, a clamin a câs, a disturbin e po...
- Sì, po! Propi cussì. Che o vevi voie di clamâ la pulizie, propi cumò devant
- Eh, sì, siore, o savin, o savin. Ma cumò, e viodarà che ju becotin, che no i daran plui fastidi
- Eh! E sares ore! Disturbâ cussì la int, nancje che a fossin...
- E à reson siore, e à resonone! Ma di cumò in devant, e viodarà che...
- Mal garantissie lui?
- Sì, sì, o pues garantî
- Ah! Va ben, alore, grazis

-Di nuie, siore, ariviodisi

-A riviodsi, benedet, ariviodilu

-Ah, siore? Siore? Ise ancjemò lì?

-Eh? Sì, o soi ca

-Alore...siore...mi racomandi...lis ulivis...di chês neris, eh!

***di Laurin Zuan Nardin***